

DISSERTATIO THEOLOGICA
DE
CONCUBINATU,
A CHRISTO ET APOSTOLIS
PROHIBITO.

QVAM
RECTORE MAGNIFICENTISSIMO,
SERENISSIMO PRINCIPE AC DOMINO,
DN. FRIDERICO WILHELMO,
PRINCIPE BORUSSIÆ, MARCHIONE BRAN-
DENBURGICO, RELIQUA.
IN ALMA FRIDERICIANA,
FACULTATIS THEOLOGICÆ UNANIMI CONSENSU,
PRÆSIDE

D. JOACH. JUSTO BREITHAUPT
Abbate Bergenfi Magdeburgio,
R. Consist. & Theol. Fac. Sen. Gen. Superint.
Direct. Sem. Th. & Sacrorum Hildersl.

D. XXIX. APRIL. A. MDCCXIII.

defendet
BERNHARDUS Baumgart /
NEO-HALDENSL. MAGDEBURG.

HALÆ MAGDEBURG.
Typis **ORPHANO TROPHEL.**

VIRO
PERILLUSTRI ET GENERO-
SISSIMO,
DNO CAROLO
DE DIESKAU,

POTENTISSIMI REGIS PRUSSIÆ CONSILIA-
RIO INTIMO, CONSILIARIO REGIMINIS AC
PROVINCIAE DUCATUS MAGDEB. &c.

Magdeburgicorum Theologiæ cultorum
Mæcenati benignissimo,

Specimine hoc Academico
se suaque studia

decentissimè commendat



BERNHARDUS Baumgart/
Neo-Haldensl. Magdeburg.

36) 1 (56



DISSERTATIO THEOLOGICA
DE
CONCUBINATU,
à CHRISTO & Apostolis prohibito.

SUMMARIUM.

- (I.) Gregorii Nazianz. observatio de rebus, quæ in Scripturâ S. continentur. (II.) Quæstio præsens de Concubinato est in Verbo Dei κατὰ δικάσιαν. (III.) Concubinitus, de quo agitur, in se & suâ naturâ adversatur juri divino; (1) ob libertatem dimittendi, ei essentialem. (IV.) Veteris Testamenti concubinitus matrimonialis, cum libello repudii, in Novo Testamento est prohibitus: multò magis ergò concubinitus, qui non est conjugium, sed huic oppositus. (V.) Divino juri adversatur (2) ob defectum unionis & amoris maritalis, non minùs essentialem concubinitui. (VI.) Ulterior gratia Evangelii nullum relinquit locum, neque libello repudii, neque pellicatui, in Veteri Testamento permissis; multò minùs concubinitui celibum & viduorum, nunquam permissis: quoniam gratia JESU CHRISTI redundantior est, ad duritiem cordis faciliùs superandam. (VII.) Ex iisdem rationibus divinis Patres jure ac merito suo defenduntur.



§. I.

Quando Ecclesiæ hodiernæ conditio evadit tam misera, ut negetur à quibusdam, quòd *concubinatus omnis à CHRISTO vel Apostolis fuerit prohibitus*; necesse est, huic malo eatur obviam modo eodem, quo GREGOR. NAZIANZENSIS in apricum producebat Scripturæ S. divina dogmata, si qua negarentur in eâ contineri. *Oratione XXXVII.* is docet, in litteris sanctis observandum iccirco esse usum partitionis hujusmodi: (a) *Rerum alia non sunt, sed dicuntur*; (b) *alia, quum sint, minimè dicuntur*; (c) *alia nec sunt, nec dicuntur*; (d) *alia denique & sunt, & dicuntur.*

- (a) Græcæ Ecclesiæ hic Pater, qui solus post *Evangelistam Johannem* nomen *Theologi*, tanquam proprium, reportavit, propterea quòd plenus est observationum, Theologiam mirificè illustrantium; animadversionis PRIMÆ probationem exhibet sub *affectionibus corporeis*, quæ in Deo non sint, de ipso tamen dicantur, neque id sine *fundamento rei* certissimo: secundum Psalm. XCIV, 9. *Qui plantat aurem, nonne audiat? si est formans oculum, num non spectabit?*
- (b) SECUNDUM rerum genus, ut res in Scripturis sint, nec suis vocabulis exprimantur, ostendit in iis, quæ ex evidentibus testimoniis tantummodò colliguntur: ut, *Ingenitum, & Independentem*, esse DEUM, nusquam legitur, nihilominus sine ullâ dubitandi ratione intelligitur ex Jes. XLIV, 6. *Ego primus, & Ego novissimus, & præter me non Deus.*
- (c) TERTIUM, eorum, quæ nec sint, nec dicantur; monstrat in verè contradictoriis: v. c. *Deum improbum, tempus præteritum esse præsens*; qualia in Verbo Dei non reperiantur.
- (d) QUARTUM, per se innotescit, constans ex iis, quæ & sunt, & dicuntur in Scripturis Sacris: cujusmodi ubivis obvia.

§. II.

Concubinatum, seu conjunctionem domesticam arctiorem sine affectu maritali, cum fœminâ ejusmodi præsertim, quæ justa uxor poterat esse; à CHRISTO & Apostolis non esse prohibitum, qui contendunt, existimant frustra, opinionem hanc suam fundari in eo, quòd dicta Scriptura, contra Concubinatum istum quæ proferri solent, de ipso non loquantur, nec videantur agere. Ex quo animadvertimus, in causâ hac disquiri de *hypothesi* quadam *secundi* illius rerum generis: utrum videlicet dictus concubinatus, licet ejus non fiat mentio in Novo Testamento κατὰ ῥητὸν, sit tamen damnatus in eodem κατὰ διάνοιαν?

Adversus eos, qui aliquam negant veritatem, quæ per consequentiam certam omninò in Scripturâ S. continetur, loc. cit. Theologus indignatione justissimâ utitur sequente. *Quum in nominibus & rebus tantum discrimen reperiatur, quid causæ est, cur litteræ tantopere servias, Judaicæque sententiæ te ipsum adjungas, relictisque rebus syllabas confecteris? Quòd si, te bis quinque aut bis septem dicente, decem aut quatuordecim ex verbis tuis colligerem; aut ex eo, quòd animal ratione præditum & mortale diceres, hominem esse, concluderem; an tibi nugari viderer? Nequaquam profectò, quum tua dicerem. Neque enim hæc verba magis sunt ejus, qui loquitur, quàm illius, qui loquendi necessitatem assert. Quemadmodum igitur hîc non ea magis, quæ dicuntur, quàm quæ intelliguntur, expenderem; eodem modo nec, si quid aliud eorum, quæ vel nullo modo, vel certè non satis apertè dicuntur, ex Scripturâ tamen intelligi colligique reperirem, adeò te inanem verborum interpretem pertimescerem, ut ab enuntiatione istâ refugerem. Conferri poterit ejusdem Oratio XXI.*

III.

Fundamentum dijudicandæ *Questionis* rectè ponitur Matth. XIX, 4, 5, 6, 7, 8, 9. in ipsâ interpretatione, quâ DOMINUS declarat Institutionem matrimonii ex Gen. II, 22, 23, 24. Nam docet eâ Christus: vi (a) Institutionis divinæ,

omnem unionem in unam carnem, quæ fieret cum foemina (b) *dimissibiliter*, fuisse (c) illicitam. Quæ enim in Vet. Testamento intervenerat peculiaris per Moſen *dispensatio*, hanc DOMINUS, restituens primam intentionem DEI, adventu ac verbo ſuo tollebat. Jam autem Concubinatus, de quo nunc agitur, ſicut indicatum eſt, ſignificat unionem cum muliere non *indimissibili*, ſed quæ dimitti potuerit in *Novo Testamento*, nullâ interveniente novâ dispensatione poſt *Mosaicam* abrogatam. (d) Fuit ergo is utique à Christo prohibitus, ac damnatus in Novo Testamento; & quidem eo ipſo quàm maximè, quòd hunc concubinatum *dimissibilitas* ingreditur *essentialiter*, contra divinam institutionem unionis inter marem & foeminam.

(a) Notandum, quòd teſtetur Dominus Matth. XIX, 3. ipſum *Creatorem* dixiſſe verba *Adami* illa Gen. II, 24. *propterea derelinquet homo patrem & matrem; & adhærebit uxori ſuæ: & erunt hi duo in carnem unam.* Quum igitur ex iis ſic illatis ſuum derivet iudicium, haud ſuperſeſſe poteſt dubitatio, quin illud ſit *interpretatio* eorum, quæ ad mentem DEI, circa unionem in carne unâ, verè cognoscendam, pertinent.

(b) Adverſus *concubinatum* æquè, ac contra *libellum repudii*, quem abrogat Chriſtus, Hic ex DEI Institutione, unionis ad carnem unam, ſic argumentatur: Quòd ſi à Conditor ipſo inſtituta eſt illa unio cum foeminâ haud dimiſſibili, neceſſarium eſt conſequens, ut ab initio in rebus licitis non fuerit, neque ullum *repudium*, nedum *cohabitatio* cum muliere dimiſſibili. Matth. XIX, 6. 8. Ratio *Antecedentis* commonſtratur in eo, quòd, qui ſecundum Dei voluntatem una ſunt caro facti, non amplius ſint *duo*, ſeu, quod Chriſto idem, haud diſſolubiles, ſed *conjugati à DEO*, nec ſejungendi ab homine. v. 6.

Neque obſtare, addit, quòd *libellus repudii* à Moſe fuerit *mandatus*; Moſen etenim non tam præcepiſſe illum, quàm modò permiſiſſe pro *duritie cordis* Judæorum. v. 8. Tam-
eſi

etsi namque Judæis ad tempus fuit permissum, (ne interim tantopere, ut antea, *contra* DEI voluntatem in hac re offenderent, stante adhuc vetere ipsorum œconomiâ) tanquam remedium quoddam, publicum divortii instrumentum adhibere; quod tamen dimissio hujusmodi *præter* voluntatem Dei usurparetur, documento erat perpetuo ista necessitas ritûs solennis imposita, sine quâ divinam *dispensationem* exsequi non licebat. Hâc verò tandem per CHRISTUM, & expressis quidem verbis v. 9. sublatâ; simulque stabilito primo interdicto: v. 8, quid superest, quod ex eo tempore sit licitum relictum in concubinato matrimoniali, seu *pellicatu*? & hoc reddito illicito, quid dicamus de concubinato nostræ *questionis*, qui missionem mulieris inter Christianos, quasi humano arbitrio integram, supponit? Per eam ipsam enim *presumptam* dimittendi facultatem, seu *dimissibilitatem*, habet is *vitium*, seu turpitudinem, in se & naturâ suâ, tendens adversus institutionem: *dimissibilitas* verò per se non potest non inferre simul & *vagum* quid, & *clandestinum* quid; in quo utroque etiam pugnat cum Institutionis regulâ concubinatus.

- (c) Quod ab initio fuit illicita fœminæ unitæ dimissio, certè originem non habet, neque ex hypothese Pontificiâ, de *matrimonii Sacramento*; neque ex *Jure Canonico*, quod tunc nullum extitit: verùm ex *Institutione* divinitus patefactâ id ostendit Interpres Optimus Maximus, JESUS CHRISTUS. Neque hoc *institutæ* conjunctionis *proprium*, nempe *indimissibilitas*, pro *accidentali circumstantiâ*, quæ abesse queat, *moralis* integritate unionis salvâ nihilominus permanente, accipiendum est; siquidem ipsam unionis legitimæ *essentiam*, tanquam pars *essentialis completiva*, perficit. Nam, ut fuit *ab initio*, sic in Novo Testamento neque admittitur, neque permittitur unio aliâ, quàm quæ in unam carnem, nunquam ab *hominibus* separandam, coalescat. v. 6. Itaque hæc primæ væ inter marem & fœminâ conglutinationis indoles non est arbitrii humani, sed in *jure divino* sic fundata unicè, ut concubinatus ille, cujus *propriū* *essentiale* est licentia dimittendi, seu *dimissibilitas*, nihil liciti unquam habere potuerit. Quam enim vinculi genitalis consuetudinem homini separare licet, eam DEUS nec conjunxit, nec voluit à principio intendere aut concedere. v. 6. 8.

(d) Si quis fortè cogitet ; ipsum tamen CHRISTUM excipere *casum scortationis* , cui annumeretur *desertio malitiosa* : reputandum, quod res est. Neque enim exinde *permittitur*, quod Deus conjunxit, solvere ; nec *conceditur* potestas dimittendi. Nam in his casibus *supervenientibus*, nec *prævisis*, altera pars *nocens* vinculum disrumpit ultrò ; pars autem *innocens* , si pro conservando matrimonio fecerit, quod suum est, se non separat, verùm invita derelictionem patitur. Conferantur interpretes orthodoxi ad I. Cor. VII , 15.

§. IV.

Ex dictis simul observandum est, Concubinatum, qui significato sensu *opponeretur* conjugio , & iniretur vel ante hoc, vel eo durante ; nec lege quidem fuisse permissum Moisaicâ , nedum à Christo & Apostolis. (a) Concubinatus enim Patriarcharum, aliorumq; Israëlitarum, non erat oppositus conjugali statui, verùm inclusus: siquidem secundum *regulam* non aliæ mulieres illis permittebantur, quàm quæ conjuges, aut *primariæ*, aut saltem *secundariæ*, veræ tamen ac legitimæ essent, nimirum individuae. (b) Quum verò nec *Polygamia* hæc à Christo & Apostolis sit tolerata amplius, sed Christiani tam ab eâ, quàm à temerariis *divortiis* , statim revocati fuerint ad primam conjugii Institutionem : Matth. XIX, 6.8. (c) multò minùs Christi & Apostolorum sententiæ potuit esse consentaneum , ut speciem ullam dicti concubinatus, utpote qui nec Veteris nec Novi Testamenti statui conjugali congruit, dum matrimoniali intentioni, partim ex *dimissibilitate*, partim ex affectu *haud maritali* , ipsique adeò *institutioni* primæ est oppositus, non illicitam haberent.

(a) Meretur hîc legi GERHARDUS *Loc. Theol. de Conjugio* §. 555. quòd accuratè & sollicitè distinguendum sit, inter Concubinatum Ver. Testamenti, atque eum, qui tempore Novi Testamenti, *Jure Civili & Jure Canonico*, quibusdam visus sit permissus. *Concubine Patriarcharum* , inquit, *non fuerunt impura scorta , sed veræ ac legi-*

legitimæ uxores, veruntamen secundaria; quæ affectu quidem maritali, sed sine legalibus instrumentis, privatim ducebantur: ac natos ex illis liberos certis legatis contentos esse oportebat, hereditate ad uxoris, vel uxorum primariarum liberos, devolutâ. Tandem subneçtit de Scripturæ usu circa Vet. Testam. concubinas: quæ ab uxoribus ita distinguuntur, ut illud nomen eis penitus derogetur, illæ fuerunt scorta.

- (b) Ex intentione DEI huc etiam tendebat præceptio de libello repudii, ut testarentur eo, ac recordarentur, sibi ex primavâ conjugii institutione haud licitum esse divortium. Conferendus meritò *Marcus Evangelista* c. X, 7, 8, 9. magnopere ex ore DOMINI urgens individuum unionem. Quocircâ minimè est, quod dubitemus, an libellus divortii debuerit etiam dari *secundariis* uxoribus: præceptum enim est *generale*, nullam speciem excipiens. Nec deest ratio sensûs *universalissimi*. (1) Non minùs *secundaria*, quàm *primaria* conjux, ex institutione fit caro una, & secundum Christi interpretationem, inseparabilis. Neque obstaculo est, quòd Paulus dicat *1. Cor. VI, 16.* & eum, qui agglutinetur scorto, esse unum corpus: etiamsi enim, ad detestandum abusum, ita loquatur de *facto* externo, quia conjunctio carnis videtur eadem; tamen nequaquam, ad derivandum exinde *jus*, vel *juris effectum*, idem illud extendit Apostolus. Quando nimirum mas foeminam contubernalem non dignatur reputare *uxorem suam*, ut Institutio expressè habet: tum ille est testis adversus semetipsum, quòd cum eâ ipsum non DEUS conjunxerit, verùm præpostera arbitrii sui malitia. Nec verò vel is legitimè caro fit una, qui conjugium verbis quasi initum, non re comprobabat; sociam non declarans *suam uxorem* coram Ecclesiâ, seu Christianâ Republicâ, iis ritibus, sine quibus hæc conjugium nullum verè consummatum agnoscit. (2) Ex *Deut. XXIV, 1, 2, 3, 4.* intelligitur; nisi datus fuisset repudii libellus secundis etiam uxoribus, publicum illud documentum cessâisset, quo deterrebantur & accipientes & dantes, ne istæ ad maritum primum, si nupsissent alteri, redirent unquam, neque hi ipsas reciperent: id quod *abominatio* erat coram JEHOVAH, quâ quis faceret terram peccare. Ad hæc & superiora legatur pluribus BALDUINUS in *1. Cor. VII, 11, 12, 13. qu. IX. p. 366.* quòd in hoc *Deuteronomii* loco, quic-

quicquid videatur *præcipi*, referendum sit, non ad ipsum divor-
tium, sed eius *modum* circa libellum repudii; & quàm gravis ex-
titerit hujus solennitas dimittentibus, quâ Deus divortium omne
improbârit.

- (c) CHRISTUS designat tantum uxorem unam, seu duos conju-
ges, negâtque, ab initio constitutionem aliam fuisse. Unde agno-
vit CHRYSOSTOMUS, 1. Tim. III, 2. 12. & Tit. I, 6. cum epi-
scopus requiritur, qui vir *unius* mulieris sit; his verbis *damnari ex-
pressè polygamiam*. Licet verò sint ac fuerint, qui, id quidem non
refellentes, nihilominus statuunt simul, *Conversorum* ex Judaismo
ac Gentilismo imbecilliorum conjugia cum duabus, pridem ini-
ta, non potuisse dirimi, & Apostolos divinitus certiores factos,
pro tempore indulgentiam iis pristinam cessisse, ut majora evi-
tarentur mala; alii verò animadvertant, haud opus esse, ut dicta
ista connotent quosdam, qui adhuc plures uxores habuerint,
verum notare modò Christianorum aliquos, qui repudiatâ uxore
duxerint aliam, de quâ bigamiâ & antiqui Canones soleant que-
ri; vel, qui antea duas conjuges habuissent, quamvis non habe-
rent adhuc, quippe qui nec ipsi ad *Gratus* Ecclesiasticos in Ca-
nonibus admissi fuerint; res tamen salva permanet omni modo.
Certum est, Apostolos nequaquam tolerâsse, ut Christiani am-
plius duas reciperent in matrimonium, nedum, ut foverent con-
cubinas; nec posse verba, ad *Timotheum* & *Titum* scripta, quem-
cunque in sensum, aliter sumi, quàm ad denotandum dedecus
atque *scandalum*, quod cum justo Christianismo conciliari ne-
queat, utut Synagoga vetus non sine honore fuerit sepelienda.

§. V.

Addenda nunc caussa altera, ob quam Christus & A-
postoli non potuerunt concubinatum licitum censere; sita in
defectu *amoris conjugalis*. Quemadmodum enim ipse DO-
MINUS ex Institutione in marito requirit conjugis *unita-
tem*, ita *unionem*, pariter haud vulgarem inter eos, sed talem
omninò, ut præ patre & matre isti ille adhæreat; neque ali-
ter, quàm ut ipsam æstimet unicè ac solenniter *uxorem suam*.
Hæc

DE CONCUBINATU.

9

Hæc enim dictio è *Genesi* ubivis hac in re est repetita: cujus significatio divina, & quid *Biblicè*, sensu Christi & Apostolorum, denotet *affectus maritalis*, citra quem, publicè testandum, nulla commixtio ad ipsam unionem in unam carnem, quæ divinitus instituta est, referri possit; optimè explicatur Ephes. V, 21--33. Ex qua observatione duo illa necessario consequuntur: (1) ut Christi atque Apostolorum tot locis frequentata *emphasis*, (a) de *propriis*, vel *suis* uxoribus, planè sit *exclusiva*, adversus omnes alias, quæ uxores non sint. (2) ut omnia *dicta*, quibus scortatio & adulterium damnantur, thoro opponantur legitimo; ideoque ea tam concubinatum quemvis, quàm reliquas flagitii species, prohibeant. (b) Ratio *fundamentalis*; suprà & modò dictus defectus unionis, *verè rationalis* secundum institutionis regulam, utpote qui concubinatui *essentialis* est.

- (a) Præter ea, quæ circa hanc rem suprà exhibentur, consideratu dignissima sunt 1. Cor. VII, 2. 8, 9. *Quisque suam uxorem habeto, & proprium quæque virum habeto, διὰ τὰς πορνείας, propter ipsas scortationes*: quod interpretes verissimè interpretantur ita, ut animadvertant, tum *pluralem numerum* notare omnes pollutionis species, ad quas spectet, quicquid consuetudinis verum non sit conjugium; tum verò, mentionem finis matrimonialis hîc non variam fieri, ut eò significantiùs contendat Apostolus, licet plures sint matrimonii *causæ finales*, se tamen hoc loco de iis non fusè latè-que agere, sed producere fugam quarumlibet scortationum propterea, quoniam medelam, pro ipsis evitandis, alia nulla supeditet in unionem vivendi ratio, quàm quæ verè & arctissimè sit conjugalis. Nam ipse Paulus sic declarat mentem suam v. 8, 9. *Dico cælibibus & viduis: si se non continent, contrahant* (non sanè concubinatum, sed) *matrimonium*; subjungens, quia *melius, matrimonium contrahere, quàm uri*. Ecquid est, quòd tam præcisè coarctetur oppositio, inter matrimonium & ipsum unctionis periculum? Obsecro, annon hacce *antithesi* tam concubinatum, quàm

alias scortationes, vetat? neque enim dubium esse potest, has intra angustias fidelissimum doctorem gentium, qui omnibus sese accommodabat, quocunque per conscientiam poterat modo, cum matrimonio & *concubinatum*, saltem cœlibibus & viduis aliquibus, concessurum fuisse contra uestiones, si non omnem concubinatum, qui id temporis inter Ethnicos usitatissimus erat, scortationum nomine consignaret. Tam altè infixa fuit animo Apostolico CHRISTI regula: non aliam mulierem admittendam, nisi quæ dimittenda sit nunquam! ut videre est v. 11, 12, 13. ubi eandem repetit tribus vicibus, atque inculcat.

- (b) Non sufficit; respondere ad *textus* illos, quòd loquantur de scortatione prohibitâ: nec enim de eo quisquam dubitaverit. Est autem quæstio; an non quilibet concubinatus, conjugio oppositus, sit fueritque scortatio prohibita? Asserti verò hujus affirmatio quum ipsissima sit Christi & Apostolorum sententia, ut hætenus demonstravimus; respiciatur, quæso, in Epistolâ *priore ad Corinthios*, ex initio illo cap. VII. ad posteriorem partem antecedentis capitis VI. & judicetur coram DEO; num concubini sint eximendi numero *injustorum* illorum, qui negantur *DEI hereditatem* possessuri. Videamus præter reliquos v. 13. & 15. *Corpus non scortationi, sed Domino; & Dominus, corpori.* An Dominus noster sanctissimus JESUS CHRISTUS, suo spiritu dominari poterat fidelium suorum corpori, hoc si dederent concubinatu, contra DEI Institutionem, ab ipso traditam? corpusne Domino destinabatur, quod refragante Christi castissimâ doctrinâ concubinæ dabatur? Quæ fuerant *Christi membra*, an manebant talia, si fierent *membra scorti*? nempe mulieris, quæ, contra Institutionem divinam, concumbentis viri *uxor* non esset? An non, qui concubinatum sectarentur, addicti quum fuissent Christianismo, se efferrent velut homines *sui juris*, quasi haud *pretio emti* (v. 19, 20.) ab EO, qui tanto zelo jus unum conjugii vindicat? quasi non *redempti* essent, ex *vanâ illâ conversatione*, à patribus acceptâ; & quidem *pretioso sanguine*, Agni immaculati & incontaminati? 1. Pet. I, 18, 19.

Locus Hebr. XIII, 4. è dictis suâ luce radiat: inter quoscunque

DE CONCUBINATU.

II

cunque fuerit unio carnis, quæ non sit *conjugium* honorabile & impollutum, (ἐν παντί, in omnibus, nemine excepto) ipsos esse *scortatores, vel adulteros*, à DEO ipso damnandos; nec dari tertium quoddam vitæ genitalis genus, quod, quum non sit matrimonium, melius sit adulterio ac reliquis scortationibus. Oppositio enim inter conjugium, & contrarias species duas, est directa, *adequata* & *apertissima*: ut GERHARDUS c. l. §. 559. iterum confirmat sequentibus. *Est ibi manifesta & immediata oppositio inter conjugium & reliquas omnes extra illud commixtiones, quæ fornicationis & adulterii nomine indigitantur. Jam verò concubinatus non est conjugium. Ergò ad fornicationes erit referendus. Conferatur in DEDEKENNI Consiliorum Vol. III. p. 38. Judicium Joh. HARPRECHTI Jcti.*

§. VI.

Accedit tertio. Si fuisset in Vet. Testamento licitus ille concubinatus, qui conjugii proprietatibus, de certâ *indissolubilitate*, & *affectu maritali*, non fuisset alligatus; (quod quidem minimè concedimus) attamen CHRISTUS veniens, qui ne *solenne* quidem, Mosaicâ autoritate pollens, divorcium, pro suo officio debuit tolerare amplius, debebat multò etiam magis ejusmodi concubinatum (non jam dico, habere pro re in se illicitâ, & legi divinæ prorsus adversâ; quandoquidem id abundè vindicatum est suprâ ex ipsius Christi verbis Matth. XIX. sed tantum) pro eodem suo officio, ad quod missus erat, prohibere. Quicquid sanè ob *duritiem cordis*, sub Vet. Testamenti œconomiâ, permissum fuerat; sicut libellus repudii, & pellicatus: id omne ipsâ Christi, qui fons *unctionis* existit, præsentia abrogatum erat, cessabátque ex eâ causâ; quod ipse afferret *omnibus χάριν ἀντὶ χάριτος*, gratiam pro gratiâ Joh. I, 16. hoc est, loco illius gratiæ, in umbris quæ & dispensationibus constiterat, gratiam longè præstantiorem, ut additur: nam Lex illa per Moysen data est; gratia & veritas per Jesum

Christum facta. v. 17. Quâ quidem cordis humani quamlibet duritiem facile superabant atque tollebant intra se, qui ejus verbo obtemperare vellent. Atque hinc illæ ipsius partes erant, ut divinæ *Institutionis* integritatem restitueret: uti jam vidimus. At verò, quis & inde non intelligit, Christum non potuisse, quin ipse, & per Apostolos suos, unâ cum libello repudii pellicatum Veteris Testamenti (quantò autem severius concubinatum matrimonio adversum, & nunquam concessum à DEO!) prohiberet acerrimè?

Analogia est manifestissima, atque invictum ejus argumentum hujusmodi: Si legis vigor ad tempus remittitur, ob defectum virium; tum deinde, postquam defectui succedit illarum accessio, pristinus legis vigor requiritur. Atqui per Christum hæc allata accessio. Ergò. *Fundamentalem* isthanc veritatem, ex quâ totius causæ hujus tenebræ quàm maximè dissipantur, Epistola ad *Hebræos* graviter commendat c. IX. & X. CHRISTUS, ait, *Tollit prius, ut posterius statuatur*, quod nimirum in Ipso fuerat expectandum: c. X, 9, *declarante Spiritu Sancto, nondum patefactam fuisse VIAM SANCTORVM, priore tabernaculo adhuc consistente: advenientem autem Christum, Pontificem futurorum bonorum, qui per Spiritum æternum se ipsum obtulit inculpatum DEO, sanguine suo redemptionem æternam invenisse pro peccatis nostris, & conscientias mundare, ad serviendum DEO vivo. v. 7. 11, 12. 14. unde Christiani habeant libertatem ingrediendi in Sanctum Sanctorum per sanguinem JESU, & VIAM, ipse quam dedicavit nobis, RECENTEM & VIVAM; quâ possimus accedere cum (non ampliùs duro, at) vero corde, & certâ persuasione fidei, aspersione purgatis cordibus à conscientia malâ. c. X, 19, 20. 22.* Quò etiam recipit se Apostolus iis: 2. Cor. V, 17. *Vetera præterierunt: ecce nova facta sunt omnia!* Ergòne omnes umbræ, omnes quoque dispensationes Leviticæ præterierunt? solus autem concubinatus ille, qui ne meretur quidem reputari inter *Vetera dispensabilia*, cum Christo consistere adhuc potuit? Ergò omnia corda sunt facta nova in Christo, quotquot ipsius Spiritui

Spiritui non pertinaciter restiterint : & nihilominus hic fœdissimus concubinatus in novis cordibus simul locum habuit ? Absit omninò ! Quis non videt , quantum præposteri implicet tantum errorem ! Ad quem funditus ex animis Christianis expellendum , exterminandum & ejiciendum , ipsius Christi verba quoque pertinent , apud *Matth. Marcum* atque *Lucam* , quibus Phariseorum statuta explodit : quòd *vestimentum novum non immittatur in vetus ; nec vinum novum in utres veteres injiciatur ; & quòd nemo , qui biberit optimum vinum vetus , statim voluerit novum : dicens potius ; Vetus utilius est.* Quid igitur , si Christiani olim hauserint è Christo purissimam mentem Institutionis primæ conjugalis ; an isti potuerint cogitare , concubinatum recentiore haud esse prohibitum ?

Iterum verò atque iterum monemus , *consequutionem* à rebus Veteris Testamenti abrogatis , cum quibus nil commercii habet turpis concubinatus , de quo nunc agitur ; adhibitam modò esse , tanquam argumentum *ἀνθερώπινον* , ut *absurdum* eò evidentius redderetur.

§. VII.

Eadem fuère fundamenta , ex quibus sancti Patres , (a) *Ambrosius* , *Hieronymus* , (b) *Augustinus* , cæteri que , uno ore ac corde Concubinatum damnârunt. Quorum quidem auctoritatem , propter nævos ipsorum aliquos , vilipendere ; nihil est aliud , quàm , si quis solem oderit ob nebulas , quibus interdum obducitur ; vel , si ejus radios lippus oculus non ferre potest. (c)

(a) Beatissimus *AMBROSIVS* non primus extendit notionem *adulterii* ad omnem concubitum , qui cum legitimâ conjuge non fieret ; verùm inveniebat in Ecclesiâ hanc vocis significationem , ex *Genesi* , in ipso *Decalogo* , & *Evangelio*. Ad emphasin *Matth. V, 28.* quòd *adulteraverit in corde* , quam quis ocu-

lo ad concupiscendum aspexerit ; BEZA scribit ex vero ; Rectius vetus interpres, *mulierem*, quàm *Erasmus*, qui *uxorem* interpretatur ; *quum non sit adjectum τινός vel ἀδελφῶν* : item, *adulterium hîc scortationem quoque comprehendit ; ac si diceret Christus, legislatorem omnem impudicitiam verbo MOECHARI (quo gravissimum scelus arguitur) notâsse ADVERSUS EOS, QUI SCORTATIONIS FLAGITIUM ELSEVABANT.* Conf. Job. XXXI, 1. & *Thesum Fundament.* p. 98. *Observatio Chemnitiana* IV. de legis sensu synecdochico. Quâ militante Animadversione, non est, quòd Ambrosio detrahatur laus solidæ morum doctrinæ, ex specimine illo, cùm scripsisse perhibetur, adulterium ante Mosen & Evangelium non fuisse prohibitum. Legenti enim caput IV. lib. 1. de *Abraham Patriarchâ*, in oculos incurrit planè alius sensus. Non loquitur ibi de adulterio, *strictè sumto*, sed accepto *latisimè* ; prout hæc vox *materialiter* comprehendit omne factum, quod ex Christi iudicio adversus primam Institutionem fuerit, ipsum etiam pellicatum Vet. Testamenti, qui Mosaicâ lege permissus fuit. Agit etenim expressè, non de *formali* adulterio, sed potius de *formali* conjugio, quamvis secundario, quod Abrahamus cum ancillâ, secundum Saræ voluntatem, inierat. Quid verò mirum, quòd casum illum excuset *circumstantiâ* temporis ? nec negans quidem, antea prohibitum fuisse adulterium, ita acceptum ; sed, quod notandum benè, satis cautè scribens : *nondum interdictum VIDEBATUR* ; cum ratione præfixâ, *quia Abraham ante legem Moysi, & ante Evangelium fuit.* Quibus sat innuit simul, ne esse quidem in eo facto adulterium secundum Mosis legem ; si verò habuisset ille interpretationem doctrinæ Evangelicæ, à Christo allatam, *de unâ conjuge*, eum Saram suam auditurum nunquam fuisse in hoc negotio. Unde & concludit ibi rectissimè : *Non ergò in legem commisit Abraham, sed legem prævenit.* Immo in sequentibus mentem suam exponit clarissimè, qui non neget errati culpam in veteribus, sed, *pœnam* avertisse Deum, prædicet ; idque ob tempus *ignorantiæ*, quo se tueri non possint, qui tempus *fidei* sint assequuti. Utinam hâc cum benignitate

tate sanctissimi Patres legerentur, quæ illis jure communi debetur ante omnes, ut judicarentur è *contextu* integro ; non profectò carperentur ita, ut sit magno cum detrimento, non ipsorum quidem, sed Ecclesiæ, sed eorum etiam, qui hisce angelorum consortibus coram Throno Dei, & primariis cæli Ecclesiastici stellis, ubi à verâ luce nihil alieni habent, non parcunt !

(b) Verè ad Deum conversus AUGUSTINUS, qui concubinatum, ceu pestem animi Sancto Spiritui invisam, expertus fuerat tam diu, majorem fidem meretur, quàm apud criminis ejus defensores obtinet. Ut ubique omnes adversus hoc ipsum repeteret rationes, quæ inter Christianos satis obviæ sunt, non erat opus. Cæterùm is minimè fatetur, quòd ex *Decalogo* probari nequeat, concubinatum esse fornicationis speciem. Patris sermo tantummodò *conditionalis* est : *SI non omnis fornicatio etiam mœchia dici potest, ubi sit in Decalogo prohibita illa fornicatio, quam faciunt viri, qui uxores non habent, cum fœminis, quæ maritos non habent, utrum inveniri possit, ignoro.* Quantum verò dissideat modus loquendi cum *conditione*, & *particulâ SI*, à directo affirmandi modo, testatur, unà cum *Logicis*, Evangelista *Iohannes* c. XXI, 23. ubi ex ore DOMINI & ipse pernegat, ita quod efferatur, pro concessione *omnimodò* accipiendum esse. *Non dixit JESUS illi, quòd moriturus non esset : Sed, SI illum volo manere, donec veniam, quid ad te ?* Non ergò habemus hîc Augustini confessionem, quam esse *absolutam* operteret. verùm contrà, neutiquam admittâ *conditione*, affirmationem habemus contrariam eò fortiores; at, cujus quæstionis? non equidem, an concubinatus sit fornicationis species? sed, quia id, tanquam *suppositum* assumitur, quæstionis alterius, nempe hujus : an omnis fornicatio, cujus species quædam concubinatus, dici possit mœchia? Quæ ipsa *Conclusio* ibidem urgetur his verbis : *profectò nomine mœchie omnis illicitus concubitus DEBET intelligi.* Locus reperitur in *Quæstionibus* Augustini super *Exodum*, qu. LXXI. p. m. 149. Integer sensus hic est : *Omnem mœchiam* dici etiam fornicationem in

Scripturis, secundum exemplum Matth. V, 32. & necessarium esse, ut vicissim *omnis fornicatio* dici etiam possit mœchia, licet nullum hujus locutionis exemplum (quale quidem antè ostendimus ex eodem capite Matth. V, 28,) in Scripturis occurreret. Quærenti, cur hoc tam necessarium? respondet; hanc *necessitatem* rei subesse *hypotheticam*, quòd, quum nemo dubitet Christianus, fornicationem omnem in Decalogo vetitam, atque, exempli gratiâ, ipsum concubinatum inter homines solutos; ei non aliter locus sit in Decalogo, quàm si in sexto præcepto, sub *mœchiæ* nomine, cum quibusvis aliis scortationibus, collocetur. Idem confirmans, illustrat ex *analogiâ* septimi præcepti; ubi sub *furti* nomine, tanquam *toto*, quælibet *pars*, seu species *illicite usurpationis rei alienæ*, v. c. *rapinæ* quoque comprehendatur: similiter proinde sub mœchiâ, concubitum illicitum omnem, & concubinatum non minùs, contineri. Quæ quidem *analogia* eâdem ratione ab Apostolo monstratur in mandato quinto, 1. Joh. III, 15. Hactenus etiam nihil, quod Præsulem Hipponensem vitii *Logici* (dicti *Circuli*) incusare possit. Agit de sensu *Legis* synecdochico, declarando his modis; non, de probandâ *quæstione*, an Concubinatus sit fornicationis species? Hoc enim, tanquam *postulatum*, aliàs probatum satis, hîc ab Episcopo, ut ajunt, *præsupponitur*. Quid tandem verò inde, si fateretur Pater, (de quo tamen nihil in ipsius verbis haberi, lector peritus meritò mirabitur) ex *Decalogo* non probari posse, quòd concubinatus sit fornicationis species? An ergò hoc ipso vel Augustinus, vel quivis alius, adduceretur ad fatendum, non esse concubinatum speciem scortationis, vel, non prohiberi in Decalogo? Aliud quippe est, probare, quodnam peccatum prohibitum sit in quolibet mandato: aliud, probare, quænam species sint peccati cujuslibet. Prius probatur ex *Decalogo*: posterioris probatio non ex Decalogo petenda erit, verùm ex *Scripturâ S. universâ*. Sufficit Augustino, & nobis; omnem fornicationis speciem, sub mœchiæ vocabulo, prohiberi in Decalogo: esse autem concubinatum, jam descriptum, speciem fornicationis turpem
ac ne-

ac nefandam, ex Vet. & Nov. Testamento suprâ demonstra-
tum est.

- (c) *Augustinus, Ambrosius, Chrysostomus* peculiari sermone, & reliqui
seculorum primorum Patres, concubinatus malum non resol-
vunt in *Ecclesiæ auctoritatem*, nec in *arcana quædam Cleri Politica*,
sed ex *jure divino*, præsertim Evangelio, id agnoverunt; postea-
quam resurrectione Domini nostri Jesu Christi manifestissimum judi-
cium nostræ libertatis illuxit: ut loqui ille amat. Hinc rationes,
quibus Concubinatum proscribunt, è Christianâ Ecclesiâ,
sunt omninò *Articuli Fidei*; sunt quasi radii solis justitiæ, con-
cubinatus impiam turpitudinem detegentes, ac docentes,
quàm proclive sit humanum genus, non ex momentis ipsius libidinis, sed
potius prave consuetudinis, aestimare peccata, aut male sanæ rationis:
ut iterum scribit Augustinus de Doct. Christ. l. III. c. X. ubi Evan-
gelicum illud principium scitè constituit: *Quantò magis regnum cu-
piditatis destruitur, tantò magis charitatis* (sanctæ, erga Deum,
& proximum) *augetur*. Item illud: *Non est in carendo difficul-
tas, nisi cum est in habendo cupiditas*, c. XIIIX. Hæc autem Cupidi-
tas (mater Concubinatus, quam parum abest, quin Deum
ipsum faciant non nulli cum Poëta: *Deus ne hunc ardorem men-
tibus addit? an sua cuique Deus fit dira cupido?*) quomodo extin-
guatur gratiâ Jesu Christi, & charitate Dei effusâ in cordibus per Spi-
ritum S. Rom. V, 5. hoc verò est, quod ille totus ex Scripturæ &
sux conscientiæ testimonio commendat, (libris de Gratiâ, de
Nuptiis & Concupiscentiâ, & contra Pelagianos, alibique passim)
tanquam meliorem flammam, per quam concubinatus ul-
trò intereat; tanquam aquam vivam, quæ sitim hanc pes-
simam auferat, & accendat optimam; tanquam inchoatam libe-
rationem à corpore mortis hujus Rom. VII, 24, 25. à quo non liberen-
tur, qui sunt ad pœnam resurrecturi, quæ ipsa ejus verba sunt, li-
berari tamen possint, dummodò velint. Quam quidem
medicinam exuberantem, unâ cum matrimonio, si quis sepo-
nat, viderit, ne, *amorem veritatis non recipiens, acceperit efficaciam
erroris, ac credat mendacio, acquiescens in injustitiâ*! 2. Thess. II, 10,
11, 12. Posthabito remedio isto utroque divino, quid est, ca-
stita-

stitem sine verbo Dei in concubinato quærere, nisi mendacii *prætextus*, sub quo cœlibes, vidui, aliive adversus Deum rebelles, genio indulgent suo? Quid est *vaga libido*, si non ipsa & hæc licentia est, ubi à conjugio, à voluntate Dei, à nexu legitimo, divagaris cum unâ? Quæ tranquillitas conscientiæ, cum ratio in naturâ quærît *vinculum*, & aliud quidem, quàm quod DEUS offert ac mandat; seque ita homo à Creatore suo, & Verbo ipsius, & hujus *religione* unâ dissolvit temerè?

Ad testimonium hoc nostrum obfignandum, monemus mentes Christianas omnes, cum CHEMNITIO in *Loco de Castitate*, ex ad Eph. V, 5, 6. *Hoc nôstis, nullum scortatorem, aut impurum, aut avarum, qui est idololatra, habere hereditatem in regno CHRISTI & DEI. Nemo vos seducat inanibus sermonibus! propter hæc enim venit ira Dei in homines contumaces,*

FINIS.

